

BCG ed ÖKK: ina nova colliaziun da providiment grischuna per cassas da pensiun

La Banca Chantunala Grischuna (BCG) e l'ÖKK lantschan per il 1-01-2021 la nova societad da gestiun per cassas da pensiun Diventa AG. I sa tracta d'ina purschida grischuna cun servetschs da providiment cumplessivs complementars a la 2. pitga per fundaziuns collectivs svizras e fundaziuns da providiment en favur dal personal. Sa differenziar cleramain da la concorrenza vul la Diventa AG cun cussegliaziuns d'emprima qualidad e cun ina purschida digitalisada favuraivla per ils clients.

Concretamain porscha la Diventa AG, che cumenza per l'entschatta da l'onn cun sia activitad productiva, ina plattforma digitala da servetsch cumplain per cassas da pensiun e surpiglia principalmain lur gestiun, contabilitad ed administraziun. Il partenadi strategic tranter la BCG e l'ÖKK ha gronds avantatgs: clients da Diventa pon decider libramain tge partenaris ch'els vulan tscherner en dumondas d'investiziuns ed assicuranzas, profitan dentant da l'expertisa cumprovada da lur partenaris. La BCG metta a disposiziun sia entira experientscha en la planisaziun da providiment, pensiun e finanziaziun e las societads da l'ÖKK lur savida areguard assicuranzas. «Nus lain metter cun la Diventa AG in signal en il martgà da providiment e generar ulteriura plivalur en il Grischun», di il CEO da la BCG Daniel Fust. «Surtut la cumpetenza da cussegliaziun e vendita cumbinada da l'uniun purtadra permetta a la Diventa AG ina posiziun da partenza empermettenta», è persvas il CEO da l'ÖKK Stefan Schena. Ils responsabels sa preparian intensivamain ed en collavuraziun cun la societad «Beratungsgesellschaft für die zweite Säule AG» (Berag AG) per in cumenzament optimal. Actualmain sajan ins vi da recrutar collavuraturas e collavuratur. Cun differents clients potenzials sajan ins curt avant la conclusiun dals contracts. Sco commember dal cussegl d'administraziun ha la Diventa AG pudì gudagnar Bruno Christen, in specialist qualifitgà per l'examinaziun e la cussegliaziun da cassas da pensiun. Per il mument è el anc engaschà en il cussegl d'administraziun da la Surveglianza dal providiment professional e da las fundaziuns dal chantun da Turitg (BVS).

Gia ils 23-07-2020 aveva la BCG communitgà ch'ella fundeschia ina societad d'administraziun independenta per prestaziuns da providiment per survegnir ina posiziun anc pli ferma sco partenaria cumpetenta per cassas da pensiun, fundaziuns e persunas privatas che tschertgan soluziuns d'investiziuns performantas. Ils 11-09-2020 è la societad nova vegnida fundada. Il partenadi cun ils medems dretgs tranter la BCG e l'ÖKK dastga vegnir considerà sco premissa ideala per il cumenzament dal 1. da schaner 2021.

Contact: Andreas Lötscher, Banca Chantunala Grischuna, president dal cussegl d'administraziun Diventa AG, Chascha postala, 7002 Cuir, andreas.loetscher@gkb.ch; telefon 081 256 84 82

